



奏爲疊奉

諭旨恭摺覆

奏仰祈

聖鑒事竊臣於同治二年二月初四日承准議政王

軍機大臣字寄同治元年十二月二十一日奉

上諭此股皖逆本係陳玉成餘黨前因無巢可歸游

弋於楚豫之交現在復由房竹竄入平利南可以

擾大甯北可以竄興漢將來與石逆相似必爲川

陝楚三省邊防之患不可不迅圖剿除川東甯就

肅清豈可再令蹂躪刻下剿辦廣元股匪尙屬得

駁文忠公奏稿卷六

一

手並著駱秉章酌撥數營或由夔防抽調勁旅就

近馳剿與楚陝之軍三面夾擊永除後患等因欽

此同日疊奉同治元年十二月二十三日

上諭此股髮逆本陳玉成餘黨現在竄擾爲川陝楚

三省毗連之地山徑叢雜逼近老林從前川楚教

匪卽於此處肆擾有年此時若不迅卽殲除一經

蔓延剿辦更必棘手駱秉章旣已派兵由太平城

口一路進剿廣元股匪蕩平仍著該督添派勁旅

迅速越境追擊漢中軍務毛震壽督辦日久無功

節經諭令駱秉章多隆阿查明該藩司被人叅奏



各情未據覆奏此時賊燄更張毛震壽所部遊擊王其發等營盤爲賊所襲是否確實著駱秉章多隆阿均遵前旨速將飭查毛震壽各款查明據實覆奏副將盧又熊曾有縱勇擾民冒功放恣情弊前經諭令駱秉章將該員此次由川赴陝是否該督所派抑係另有別情查明具奏此次瑛瑛復稱該員帶兵剿賊獲勝磬山等處力解漢中之圍仍著駱秉章遵奉前旨將飭查盧又熊各情迅速覆奏等因欽此又奉同治元年十二月三十日

上諭川省東北兩路業已肅清該省兵力有餘足敷

駱文忠公奏稿卷六

二

調撥此時髮逆各股全竄陝省兵力不敷剿辦勢甚岌岌著駱秉章速派知兵大員移得勝之師馳赴漢中一帶將曹逆股匪尅日殲除毋許遲誤等因欽此又奉同治二年正月初八日

上諭漢中藍逆未除甯陝復有川匪滋擾若再勾合髮逆爲患曷可勝言並著駱秉章速派知兵大員馳赴陝境先將曹逆殄除相機援剿以助陝省兵力之不及川陝唇齒相依諒該督必不稍分畛域也等因欽此又奉同治二年正月十一日

上諭據瑛瑛奏毛震壽剿辦漢南賊匪一時恐難蕺

事請飭川楚兩省揀派大員接統其眾俾該司回任籌支軍餉等語毛震壽所部本係川省兵勇卽著駱秉章速派知兵大員來陝接辦漢南軍務毛震壽被叅各款仍著該督查明迅速具奏曹逆竄陷甯陝必須添兵而陝南實係空虛無兵可撥川省軍務將次完竣駱秉章素顧大局著仍遵前旨酌調勁旅數千會剿曹逆以濟陝省兵力所不逮等因欽此初六日復承准議政王軍機大臣字寄同治二年正月十五日奉

上諭前因陝西藩司毛震壽在陝南剿賊日久無功

駱文忠公奏稿卷六

三

叠被人叅劾諭令駱秉章查明具奏並酌保堪勝藩司之任者前往統帶尙未據該督覆奏現據恩麟具奏該藩司以洋縣藍逆衝陷官軍營盤兵饑餉絀貽悞大局稟請恩麟奏叅治罪察其所稟各情該藩司一籌莫展斷難望其復振而陝南賊勢日熾不可不急易一統兵之將以專責成易佩紳陳天柱名位雖卑其才力是否足以獨當一面或川省另有武職大員可以派往均著駱秉章酌擬具奏藩司關係緊要如有知兵之員固屬人地相宜尙一時未得其人但得寔心任事之賢員亦可

望其勝任駱秉章素能留意人才著卽迅速奏聞
候旨簡放或川省未得其人卽於該督平日所知
可以迅速到任者亦不妨出具考語據實具奏甘
肅回匪滋擾提督馬德昭尙在西安未能赴任而
該省總兵亦俱在各路軍營現委副叅遊擊護署
難望得力肅州鎮總兵何勝必巴里坤鎮總兵熊
煥章近在川省該省得力鎮將尙多而甘肅需才
孔亟著駱秉章卽飭該二員迅帶所部卽道白馬
關馳赴甘省用資會剿前諭調兵赴漢中並撥餉
十萬兩一併解往嗣又因興安緊急復諭迅撥勁

旅前往協剿漢中軍情挫失川省旣派兵馳剿興
安之匪兵力或不敷分撥卽著酌撥餉銀交漢中
各軍以拯饑乏毋再遲緩再署湖北提督江長貴
前經給假回籍現在皖南防務已有大員統帶著
該督卽飭江長貴迅速馳赴直隸聽候簡用並著
傳諭該提督卽日起程不必俟假滿再行北上以
副懸望等因欽此伏查川省李卯周郭各股滇匪

雖已次第盪平石逆自橫江敗遁滇境游奕永

善昭通之間近復勾結滇黔游匪自雲南大關

分竄川界珙縣之王家場高縣之落木場等處

仍圖竄擾敘南該處雖有臬司劉嶽昭一軍隨
方策應並有湘果三軍分扼橫江以至屏山密
布金江沿岸以防狡寇聲東擊西回撲搶渡而
該逆復分股由雲南鎮雄趨向興文敘永一帶
意圖牽制臣已飛調重慶鎮唐友耕督率所部
星馳截剿以固瀘渝藩籬乃其中旗一股自崔
烏司上竄意欲直撲甯遠府城至河西地方代
辦縣丞升用知縣葉淮督團抵禦力竭陣亡因
恐賊勢鴟張臣分撥總兵朱桂秋統帶桂字華
字兩營楚勇馳往攻剿該逆聞風暫頓河西經

署建昌鎮文陞甯遠府知府李祐督帶兵勇分
道迎擊迭挫兇鋒遂將河西收復賊已敗退德
昌是石逆假徑滇黔往復奔突實則注意蜀疆
多方牽綴欲以全力乘我之懈而滇省苗土各
匪黔境白號分股皆藉勢擾及邊界獸駭豕突
沓至紛窺川南自甯遠以至綦江上下數千里
間節節不能鬆勁兵力勉爲分布萬難更議抽
調而僞扶王陳逆等旣陷興安遂蔓延於平利
磚坪紫陽石泉西鄉等處在在皆與川境毗連
洋縣踞匪未殄勾結自在意中不惟陝南可慮

實亦川北之憂臣曷敢稍分畛域且屢奉

寄諭仰見

宵旰垂廬

廟謨籌算至再至三臣寢饋難安誓欲速翦此寇以

弭川陝巨患而川北僅有嚮導營川勇二千餘

名現分布城口太平兩處要隘臣復由省抽派

護軍營楚勇二千餘名馳赴保甯兼顧通江廣

元以備堵剿祇此兩軍以防川境已形單薄雖

有總兵周達武一營較爲得力現駐渠縣居保

甯綏定適中之地以爲上下榮應之師然所部

僅二千人前已飭令派弁回南增募楚勇千名

到營尙需時日若遽令越境進剿賊眾兵單多

寡懸殊難操必勝若令會合嚮導護軍兩營併

力趨陝不惟慮賊分股抗拒牽綴全師而以另

股繞竄川疆無兵堵禦顧此失彼恐陝南未就

肅清川北已被肆擾且三營出境統帥乏人進

止不齊事權莫屬尙有稍挫賊勢益張誠如

聖諭必得先選知兵大員各營皆歸統屬進退分合

臨機操縱方足以力掃鄰氛而顧本境陝西藩

司毛震壽自洋縣各營潰敗雖力圖挽救屢報

獲勝然師老賊熾實難望其復振其被叅各款
此間相距較遠一時旣難確查且軍務方殷應
俟接替有人再行由陝查辦至易佩紳陳天柱
皆非統馭之才而川省文職大員知兵者固難
其選卽武職大員自雲南提督胡中和以下如
總兵蕭慶高何勝必朱桂秋等皆督帶一軍臨
敵可期勇敢而謀畧兼全可以指揮悉當臣實
未敢深信然陝南軍務需帥孔亟臣與藩司劉
蓉悉心搜擇惟有候選員外郎漢軍李雲麟抱
負瑰異頻年遍歷東南各路軍營曾受知於已
故撫臣胡林翼謂其才堪造就昔年帶勇駐紮
襄樊紀律甚嚴現今尙在鄂省臣昨咨調令其
帶隊來川該員職位雖卑如謀猷超眾卽令在
川增募三五百人自成一軍再由臣酌撥數營
歸其節制奏請

恩命勅令接替毛震壽所辦軍務以專剿陝南之賊
庶期所向成功此外陝西藩司關係緊要知兵
者固難得其人如廣東臬司吳昌壽爲守兼優
官聲卓著在粵曾帶勇剿賊著有勞績山西臬
司王榕吉明幹有爲敢於任事前在直隸亦曾

帶練出力此二員 素未相識得諸訪聞尚有前任雲南藩司賈洪詔樸誠穩練辦事實心現在川省 臣謹就所知所聞者酌舉三員伏候

朝廷銜鑒至甘省秦清一帶逆回蠢動護督 臣恩麟

奏調肅州鎮總兵何勝必巴里坤鎮總兵熊煥章帶隊赴甘 臣查何勝必現督湘果右軍在敘

南防剿正值喫緊不能調撥現於雷波防次抽調熊煥章統所部虎威軍飭令添足二千名由川籌給行糧取道白馬關馳赴甘境以資攻剿其已革副將盧又熊前年在棉州一帶所部勇

丁遣散之後並未札其帶勇至此次赴陝並非由 臣調派前據毛震壽稟稱該員具稟在陝西

撫 臣瑛榮處投効經該撫批飭挑選精壯三千名交毛震壽留於漢南助剿並據毛震壽稟稱

該員在丁家村寶山獲勝據南江縣探報該員在高家村截剿獲勝復據易佩紳稟報正月初七日盧又熊移營進逼斗山被賊將營撲燬等

情 臣此次所奉

諭旨有前經諭令 臣將該員此次由川赴陝是否該督所派抑係另有別情查明具奏等因 臣以前

並未欽奉

飭查盧又熊

諭旨或係途中遺失並請

飭下軍機係何日交兵部發遞沿途有無遺失按站

挨查提督江長貴臣已恭錄

諭旨咨會卽日起程北上奉

旨飭撥陝餉十萬兩現因川庫支絀臣已飭臬司牛

樹梅於陝省客民捐輸項下撥解銀二萬兩交

毛震壽行營以資接濟所有疊奉

諭旨縷細覆陳各緣由恭摺由驛具

駱文忠公奏稿卷六

九

奏伏乞

皇上聖鑒訓示謹

奏

再臣前因舊疾增劇懇

恩俯准開缺調理奉

旨賞假兩個月安心調理欽此並承准議政王軍機

大臣字寄同治元年十二月十六日奉

上諭駱秉章奏舊疾增劇請開缺調理一摺已於摺

內批示賞假兩個月安心調理矣現在石逆勾結

滇黔土匪竄擾敘南郭逆由陝竄回廣元是該省

邊防仍形喫重雖經駱秉章派令各將弁分投堵
剿必得該督指揮調度方能以次剷除一勞永逸
值此時勢多艱兼蜀地險要一時替代難得其人
該督業經賞假兩月儘可安心調理一俟就愈卽
行銷假視事仍隨時附報奏聞以慰厯念將此由
四百里諭令知之等因欽此跪讀之下感激涕零
茲於同治二年二月初六日奉到

寄諭復蒙

天語垂詢犬馬微軀仰荷

聖厯彌深感戴伏念

臣

素患咯血之疾不時舉發每

駱文忠公奏稿卷六

十

值公事繁劇籌度焦深肝火上炎精神更覺委
頓現服清補之劑病似稍減惟封圻寄重軍務
方殷老病之身時虞竭蹶而

聖恩高厚循省難安反覆思維莫知所措惟有勉遵
溫諭竭力支持照常視事以期仰副

九重眷注之至意倘此後精力日益衰頹於公事恐

有貽誤

臣

亦不敢隱飾自當隨時據實附陳所

有

微臣
遵奉

諭旨感激下忱理合附片具

奏伏乞

皇上聖鑒謹

奏

駱文忠公奏稿卷六

十一



皇上聖鑒謹

奏

再查興漢爲南山阻奧之區川陝楚三省連界
倘使髮逆勾結藍曹各股盤踞其間日久謀生
命此擊彼竄則三省邊防無日不形喫緊誠如

聖慮周詳必得三省會剿方足以蕩逋寇而靖巖疆
惟陝省回逆未平不能分兵南顧而蜀中石逆
奔突亦難以全力專事北討惟湖北尙無寇氛

倘撫臣巖樹森酌量情形能遵

寄諭親率梁作楫及員外郎李雲麟等各營勁旅馳
赴陝南居中督辦再由臣酌派數營出疆聽其

調遣其毛震壽所部將疲滑不能得力者裁汰

駱文忠公奏稿卷六

十一

選留數營併歸巖樹森節制是三省用兵而事
權歸一且以撫臣督師威望旣重呼應更靈無

需更謀知兵大員其陝西藩司一缺

簡任有人亦可專責以籌餉濟師則興漢諸寇可期

指日肅清巖樹森並可提得勝之師鼓行北出
陳倉以搗鳳翔岐山各處逆回巢穴與多隆阿

南北夾擊且巖樹森祖籍陝西該撫臣奉

命遣征必不遺餘力關中早得戡定甘肅回眾聞風

生畏不剿自平而山西餉源所出亦可撤防矣

臣愚昧之見是否有當理合附片具陳伏乞

聖鑒訓示謹

奏

駱文忠公奏稿卷六

十三



奏

聖鑒訓示謹

奏爲據報雲南省城近日情形恭摺具

奏仰祈

聖鑒事竊臣前據署昭通鎮博昌呈報雲南省城失

陷情形業經奏陳在案茲臣等接護理雲南迤

東道吳仰賢署雲南曲靖府知府吳寶森會稟

探聞署武定營叅將馬榮帶領大理回匪數千

人突進省垣佔紮五華書院百姓驚惶十五日

已刻潘總督親臨彈壓詎料逆賊馬榮遽逞狂

悖立將潘總督戕害署雲南府知府黃培林署

昆明縣知縣翟怡會上前救護同時被害惟岑

藩司尙有兵練數百人會同掌教馬德新署中

軍楊振鵬副將劉天元等在城中拒敵互有殺

傷其餘各官聞均在藩司署中又聞二月初一

日署臨元鎮總兵馬如龍由臨安帶領兵練回

省會同文武各員內外夾攻殺斃馬榮所帶逆

回數千馬榮力不能支僅帶數百人奪門而出

逃回武定有西竄大理之勢此後省垣如何定

局俟文報一通卽行續稟等情又據雲南昭通

府知府夏廷楫申報馬榮帶練數千人進省潘

總督親往彈壓被戕雲南府知府黃培林昆明

縣知縣翟怡會同時被害街巷抄掠一空被害者難以悉數二月初一日署臨元鎮馬如龍由臨安回省連夜會合兵勇搜殺馬榮帶來回匪二千餘人馬榮脫逃初四五日以後省城亦漸安靜會同眾議請徐巡撫仍署督篆總兵馬如龍署提督疏通道路等情頃准署雲南撫臣徐之銘咨錄奏稿大畧相同伏查署昭通鎮博昌前次所報雲南省城督撫及司道各官均被戕害自係傳聞未確所有雲南省城近日情形臣等據報合詞恭摺由驛具

奏伏乞

皇上聖鑒謹

奏

奏爲籌辦會剿漢南逆匪恭摺覆

奏仰祈

聖鑒事竊臣於同治二年三月十八日承准議政王

軍機大臣字寄同治二年二月初四日奉

上諭前因陝省興安府城失陷該省無兵可撥疊次
諭令該督飛飭駐劄川北之周達武等軍越境援
剿上未據該督覆奏著卽迅速調派勿稍遲延並
將援陝情形迅速具奏以慰廑念等因欽此同日
奉二月初六日

上諭此股髮逆人數究有若干未據瑛棨具奏旣稱

駱文忠公奏稿卷六

十六

竄入漢陰紫陽一帶何以又有繞竄四川之語著
駱秉章查明迅速遵前旨飭令周達武等節節進剿
會同楚陝各軍將此股髮逆相機殲除以清邊患
等因欽此同日又奉二月十三日

上諭員外郎余上華所呈簡派大員督辦三省邊防
之處前已諭令官文駱秉章瑛棨等斟酌速奏現
在官文等奏稱另設大員督辦事關三省全局鄂
省現無堪膺斯選者川省軍務稍鬆正可先撥勁
旅其如何合力會剿之處已咨商駱秉章等再行
具奏並著官文嚴樹森駱秉章等妥籌迅速會議

一面調派一面具奏免致稽遲等因欽此竊臣前以川省南北數千里環境皆賊紛窺疊擾節節宜防兵力不敷分布且乏大員統師出境急切未能撥兵援剿陝南各情形具陳在案伏維興安府鎮兩城雖經收復髮逆逼攻漢中府城據藩司毛震壽稟報屢次擊賊獲勝並由城固撥兵赴援與漢中城內兵勇併力衝突賊勢少却而逆踪蔓及沔縣甯羗其注意窺川已可灼見且藍張兩逆仍踞洋縣是陝南之賊一日未除不惟漢郡可危而川北一帶時虞紛竄臣曷敢自分畛域稍事稽延而川省兵力遽難抽調必須妥籌會剿不能不爲我

皇上縷細陳之伏查髮逆中旂一股自甯遠上竄由川西沿山急遁疊經抽調各軍追擊其勢已極窮蹙乃接會理甯遠稟報石逆已擁眾渡金沙江竄至德昌河西禮州一帶勢將繼踵圖犯腹地此路惟大渡河有險可扼而越雋冕甯路徑紛岐皆可直達彼岸沿河三百餘里凡可渡之處皆須派兵扼堵且有僻境由沈邊土司地界渡河卽可趨天全小徑以窺川西臣已調總兵

唐友耕一軍並飭署雅州府知府蔡步鐘募練二千名及木坪土兵四百五十名分布清溪以下渡口以扼越嶲冕甯大小兩路其沈邊渡口則飭護理阜和協謝國泰調派弁兵督率土司設防臣復移會雲南提臣胡中和督率所部馳赴嘉定以備策應此川省西南分兵防剿之情形也髮逆僞宰甫李福猷一股自雲南昭通分竄貴州之大定畢節現據敘永合江等廳縣稟報該逆已竄黔界之瓢兒井毛台村等處皆距川境數十里臣度該逆與石逆分道而馳一則

繞建昌以俟我不備一則突倍南以乘我不及其計誠爲兇狡臣已飛檄臬司劉嶽昭確探該

逆所向卽由高縣移營截剿以杜詭謀此川省東南分兵防剿之情形也而敘郡爲川南適中門戶不惟滇黔土教各匪聚散靡常時圖侵擾且虞石逆及李福猷兩股髮逆一經上下游各軍擊退勢必復由雲南之東川鎮雄合窺敘南滇省旣無攔阻任其往來奔突則川境敘郡之防不可一日稍疎臬司劉嶽昭所部移赴綦南臣卽抽調總兵何勝必蕭慶高各率所部仍防

敘南以期周密至川北則上至廣元昭化下至城口太平在在皆與陝南毗連處處皆有岐徑可通既經撥兵越境出剿斷難分段駐師周防兵由此進賊由彼入道途相左回顧莫及鄰疆未見肅清本境已被蹂躪現在軍餉半皆出自民間捐輸一旦撤本省之防致鄰封之寇縱使小民無怨而此後籌餉維艱軍務更形棘手此臣與藩司劉蓉再四籌度既不能不酌抽數營進援漢南更不得不選留勁旅兼防川北伏查總兵周達武所部武字營雖稱得力然其舊部僅二千名現雖添募一千餘名甫自楚來川尙未經該總兵親加訓練遽以此軍派赴漢南統計亦僅三千餘人亦萬難獨剪巨寇而此軍最爲矯捷留爲川境要擊鵬剿之師則甚可恃是以屢經鄰省咨調並蒙

諭旨指示臣不敢遽令出境者既已分兵赴漢南會

剿而本境上下二千里之防僅恃一旅往來兼

顧稍有遲頓貽誤非輕不能不留此軍以備緩

急也臣現擬抽調駐防南江通江之道員張由

庚所部三千二百人半係達縣巴州所募之勇

於南山路徑熟習並添調總兵朱桂秋所部二千二百人共五千餘名卽由南通出境先剿漢中髮逆惟川中雖已撥兵而髮逆號稱十餘萬仍須湖北分兵會剿且須統帥得人庶不致進止不齊臣接辦理陝南軍務江西藩司李桓自長沙來牘約計三月中旬起程取道湖北鄖襄而進尙需時日此間未便懸兵以待查有湖北派防鄖西之郎中李雲麟曾經遍歷各省軍營曉暢戎機經臣奏調在案近接該員來稟自願率所部二千八百人再增募五百名由興安約會川兵而進以剿爲防所陳動中欸竅不惟知其夙嫻韜鈴且忠勇之沈尤爲不避艱險臣一面飛咨湖廣督臣暨湖北撫臣卽派李雲麟由興安取道西鄉期與川中所派之兵會合並懇

天恩可否

賞加李雲麟品秩較大虛銜俾得暫爲統帥其道員張由庚總兵朱桂秋悉聽其指授方畧川楚之師將近萬人合之漢南兵勇倘能一戰而殲羣醜固屬至幸卽使先挫兇鋒得保漢郡以待李桓整旅而來次第埽盪不難削平三省邊患惟

川楚之師旣已出境會剿前次屢獲奸細及逃
出難民僉供此起髮逆垂涎蜀境並知石逆銳
意窺川亟謀糾合現在川北防兵旣已抽撥出
境川南之師萬難移動惟有周達武一軍仍令
暫紮昭廣一帶倘賊由甯羗奔突以備截剿或
賊由南通城太乘虛窺伺亦卽飛飭周達武星
馳鷓剿此外尙有平武縣之喬莊等處近與陝
境之陽平關一帶接壤山徑叢雜周達武一軍
萬難兼顧臣復調派護軍營二千餘名前往設
防值此籌餉維艱勢難再議增募現兵祇有此
數分之未免見單而川省西南北三面寇氛環
熾滇黔旣無兵夾擊陝南又亟需應援臣惟有
竭力圖維以期仰副

聖主委任之至意所有籌辦會勦陝南逆匪緣由理
合恭摺由驛具

奏伏乞

皇上聖鑒訓示謹

奏

奏爲西藏所派土兵沿途滋擾請

旨飭令撤回以免糜費恭摺仰祈

聖鑒事竊臣等前准駐藏大臣滿慶恩慶咨會奏派

糧員李玉圃督率戴琫頓柱策忍及乍了倉儲

巴等調集各處土兵一萬三百餘名剿辦瞻對

野夷旋據建昌道鄂惠委辦夷務候補道史致

康暨巴塘糧員張啟昌護理巴塘都司陳鰲前

後稟稱藏中所派土兵已到巴塘甫經入境卽

肆搶掠將火藥局側民房拆毀並拆橋梁遽送

公文塘兵皆被剝衣奪食又因需索夫馬與巴

駱文忠公奏稿卷六

三

塘土司結嫌甚至圍攻土司住寨開放鎗礮拋

擲石塊傷斃人命且防剿甚不得力等情伏查

李玉圃臣等請

旨撤回內地查辦之員乃滿慶等輒以剿辦瞻對爲

由派令督率土兵以爲冒功檢罪地步該員復

不能約束土兵縱令滋擾是瞻對尙未懾伏台

站已被騷動並據滿慶等奏明藏中祇備四月

口糧其虛實尙不可知然過此以往必向內地

索餉當此賊氛未靖撥款紛繁籌餉之艱左支

右絀豈能以有限之帑金供無益之邊費一旦

需索不遂轉以缺洵爲詞勢將擁至爐城必至
另生枝節瞻夷之患未弭西藏之衅先開臣等
已飛咨滿慶等速將土兵撤回相應請

旨敕下滿慶恩慶務卽遣撤土兵各歸本境以免騷
擾而節糜費並查瞻對前與裡塘土司構衅條
屬蠻觸相爭現值軍務未平無煩勞師遠涉惟
有派員開導使之斂兵歸巢卽或必須誓以兵
威再由臣等斟酌調派庶不至鹵莽債事別啟
衅端所有請撤西藏所派土兵緣由謹合詞恭
摺由驛具

駱文忠公奏稿卷六

三

奏伏乞

皇上聖鑒訓示謹

奏

奏爲密陳西藏實在情形仰祈

聖鑒事竊臣等前將藏兵沿途滋擾請

旨飭令撤回奏明在案旋於同治二年四月十八日

承准議政王軍機大臣字寄同治二年二月二

十日奉

上諭滿慶等奏請揀員督領番眾剿辦瞻逆破格錄
用糧員由川撥運火藥餉銀並漢番捐輸京餉各
摺片瞻對逆匪久圍裡塘梗塞驛路該酋工布朗
結復令斯美工布大股逆賊行抵巴塘及裡塘交
界之三壩地方劫去糧員行李搶奪由藏發出摺

略文忠公奏稿卷六

三

報公文其格吉地方亦有告急夷信該逆前於道
光年間滋事前任川督琦善帶兵往辦並未力攻
僅以敷衍了事以致該逆毫無畏懼將附近各處
土司任意蠶食現在川藏商賈不通兵餉轉運維
艱漢番均有饑饉之虞若巴塘再爲吞併則江卡
亦難堅守自應力籌攻剿以靖逆氛此時由巴塘
至藏番眾心各驚惶均擬奮力齊攻滿慶等現經
派委番員徵兵借餉並約會三十九族調集各處
土兵防剿瞻逆西北兩面其東南兩面必須川省
派員調集土兵四路進攻方可收事半功倍之效

該逆勢甚鴟張非僅口舌曉諭所能了事駱秉章
現派候補道員史致康督飭打箭鑪及裡巴二台
文武各員辦理著卽迅飭該員星夜前往並督同
明正土司及大小金川等處土兵約會藏中委員
四路夾擊並添派得力知兵大員前往督剿以期
速行掃除糧員李玉圃旣據滿慶等奏稱疊著勞
績督辦剿撫瞻逆軍務才可勝任卽著責令該員
統率西路漢番官員及番土各兵前往乍了察木
多一帶與川中委員會合攻剿將來如有成效自
可量予恩施此時自未便遽行超擢諾們罕汪曲

結布於征剿事宜旣經熟悉卽著滿慶等飭令在
藏坐辦與李玉圃遙爲籌商至藏中調集各處土
兵已有一萬三百餘名之多祇能備辦四個月口
糧該處庫欸旣竭火藥鉛丸尤缺乏須川中接濟
著駱秉章速行籌撥餉銀四五萬兩並撥運火藥
三四萬觔配帶鉛彈派委委員由會理州繞道滇
省之維西廳至藏巴交界之南壑或至察木多所
屬之擦瓦岡地方相繼前進毋得稍稽時日至藏
地西南兩面及西北界外各部落已多歸附披楞
廓爾喀又屢爲披楞助兵侵佔各處土地所有撫

緩番眾以廣招徠毋令再爲披撈誘惑之處著滿慶等會同妥商辦理其藏中邊備更宜豫爲籌畫滿慶等務當咨會駱秉章速將瞻對股匪先行剿除以清內患仍一面留意邊防嚴申警備以杜外侮毋稍大意糧員李玉圃叅案旣據滿慶等奏稱係川中委員擅稟該督所致著福濟景紋卽行繞道迅速赴藏遵照前奉諭旨查明辦理並著景紋將地方軍務於抵任後妥行籌辦至漢番捐輸京餉共銀五萬三千七百三十六兩零著卽存於西藏糧庫暫濟支放並著駱秉章於四川司庫應撥

藏餉內照數截扣由川起解赴京以免川藏五相運送之煩其捐資及勸捐之漢番僧俗文武人等均著滿慶等查明保奏將此由六百里各諭令知之欽此伏查西藏雖因尅扣布施啟衅實則汪曲結布意圖乘間報復暗中煽構釀成禍端溯查汪曲結布卽係前充噶布倫之璧喜歷來把持藏務自前任駐藏大臣赫特賀到藏後亟思整頓稍示裁抑而璧喜桀驁不馴轉致諸事掣肘赫特賀力不能制遂因病乞假回京此後璧喜益形跋扈全藏兵民皆動公憤璧喜懼禍自求

削髮經諾們罕呼徵呼圖克圖押令發遣當時未卽剷除遂貽後患而璧喜預以財賄買通布賚綳寺藉圖報復適值該寺喇嘛因布施爭競時璧喜早已乘隙由配所潛回暗中主謀並勾結糧員李玉圃簧惑滿慶札調璧喜藉得明目張胆必欲屠滅呼徵呼圖克圖以洩私忿藏中兵民皆爲不平迨至呼徵呼圖克圖携印潛逃璧喜李玉圃等復恣意滿慶朦混奏請以璧喜爲汪曲結布協理西藏事務卑以大權遂其私願並知呼徵呼圖克圖赴京控告罪跡難掩遂

於掌辦藏務後將呼徵呼圖克圖積欠數月兵餉補發以此牢籠人心復藉剿辦瞻對爲名徵調各處土兵揆其用意蓋恐福濟等進藏認真查辦故欲大張聲勢以爲要挾抗拒地步所奏捐助京餉仍存藏庫及籌給士兵四月口糧皆係空言恃無稽考將來卽可任意開銷是以藏兵甫至巴塘卽向土司索糧任意搶掠其爲藏中並未給餉已屬顯然倘不亟使撤回勢必擁至鑪城轉向內地索餉枝節叢生其患較之瞻對尤甚而滿慶轉得以缺餉爲詞諉過內地凡

此狡謀皆係汪曲結布卽壁喜與李玉圃狼狽
爲奸李玉圃未見寸效而滿慶輒敢奏請

賞准破格錄用予以威權其受李玉圃挾制主使已
可概見若竟遂其朋比之私李玉圃旣得藉統
帥土兵爲藏身之固汪曲結布復以協理藏務
攬把持之權勢迫威脅植黨日眾勢將廢置自
由不復恪遵

朝命邊遠之區尙竟紛紛效尤害將伊於胡底然此
時福濟景紋徒手前往不惟於事無濟且恐有
損威重若使督兵遠涉聲罪致討無論軍務未
靖無兵可撥兼以山川險遠風土異宜餉糈旣
不易籌辦理諸多棘手臣等籌踏至再惟有先
將訪查實在情形密陳

宸聽請

旨速令撤回土兵免致索餉擾及內地並須先將李
玉圃調離西藏則汪曲結布無人代爲主謀不
至狡焉思逞然由臣等徑行札調李玉圃必懷
疑懼愈與汪曲結布互相固結將復要求滿慶
藉詞奏留此時惟有不動聲色設法先離其黨

伏乞

敕下滿慶等現因呼徵呼圖克圖到京控訴皆係一面之詞飭令李玉圃來京質証以便折服其心有此

諭旨釋其疑懼俟李玉圃到京上年呼徵呼圖克圖之案自易查辦而汪曲結布亦少一黨免致煽動番眾多方抗阻爾時福濟等再行進藏相度機宜隨時妥辦庶或稍弭禍謀全藏可望安靖矣臣等愚昧之見是否有當謹合詞恭摺馳

奏伏祈

皇上聖鑒訓示施行謹奏

駱文忠公奏稿卷六

奏

奏爲生擒逆首僞翼王石達開等並剿滅髮逆巨股恭摺由六百里馳

奏仰祈

聖鑒事伏查僞翼王石達開在粵逆起事首惡中最爲狡悍善戰其蓄謀窺蜀匪伊朝夕自上年正月間由湖北利川入川境卽欲徑渡大江肆其紛擾經臣調兵節節扼剿該逆沿江上下迄不得逞乃自長甯敗走敘永綦江遁入黔境復由敘南來犯龔屯於橫江雙龍捧印等場綿亘數百里銳意渡金沙江以圖侵軼腹地經臣分

撥諸軍面面兜剿挫其兇鋒該逆兩次犯蜀皆爲重兵堵截不能展其馳騁旋復退入滇境而譎謀未息以中旗賴裕新一股先自甯遠冒險內竄以僞宰輔李幅猷一股仍由黔境下趨以圖牽綴大兵而自率大隊由滇之米糧壩踵境渡金江臣撫湘十年屢因石逆用兵稔其不憚險遠最善伺隙乘虛此次中旗敗匪足不停趾晝夜狂奔預料石逆在後必謂我軍皆已跟追中旗一股不暇回顧乘勢急進使我驟不及防臣揣度旣審自當以嚴扼險隘毋使闖入查大

渡河爲西南巨壑發源天全土司境內流經魚
通之瓦斯溝與瀘水匯流冷邊沈邊至清溪以
下復入夷地不惟自越嵩冕甯大小兩路必經
之安慶埧以至萬工汎沿岸二百餘里渡口十
三處皆應嚴防而上游之瀘定橋以至化林坪
下之灣東皆可越松林小河由此徑渡以旁入
天全石逆兇狡多謀一處疏漏卽不足以制其
死命臣當卽一面飛飭署雅州府知府蔡步鐘
就近選募熟悉地利勁勇並調阜和營及木坪
松林漢土各兵一面由温郵抽調重慶鎮唐友

耕一軍先行馳防安慶埧以至萬工汎大小兩
路渡口札飭松林地土千戶王應元督帶頭目
土兵以扼松林小河防其旁竄化林坪瀘定橋
一帶仍慮土司兵單復調雲南提督胡中和所
部湘果左軍分布化林坪以至瓦斯溝以爲聲
援並檄護阜和協謝國泰督本標兵馳赴磨西
面猛虎崗以防竄打箭鑪之路比時中旗殘匪
遠遁陝境臣急調總兵蕭慶高何勝必湘果中
右兩軍兼程馳赴雅那榮經以爲後勁而防奔
逸並札飭印部土司嶺承恩帶領夷兵將越嵩

大路各隘紮斷逼賊使入夷地小徑卽從後包抄以絕回竄酌賞嶺承恩王應元土夷各兵銀物以昭激勸而資得力面面張羅層層設守乃三月二十五日唐友耕蔡步鐘等馳至河邊布置甫定而石逆果擁眾三四萬人繞越冕甯知越嶲大路有漢夷各兵扼截遂由小路於二十七日逕奔土千戶王應元所轄之紫打地是夜松林小河及大渡河水陡漲數丈勢難徒涉賊眾搭蓋筏棚屯聚一面趕造船筏三十日申刻賊千餘人至河邊窺渡被我兵施放鎗砲轟斃

數十人賊遂退連日隔河游奕意在疲我兵力四月初四日賊出隊四五千擁至河邊拖有木船竹筏數十隻每隻皆有悍賊數十人用擋牌護身拚命搶渡棚內眾賊皆出助勢隔岸呼噪聲震山谷我軍排列河岸屹立不動以鎗砲連環轟擊立斃執旂紅衣賊目數名並將賊筏火藥引燃同時炸裂賊眾紛紛落水間有數筏飄至下游亦被我兵沿流擊沉搶渡之賊無一生還隔岸之賊遂皆懾退是夜亥刻逆匪數百人執持火把沿河採路復被我兵隔岸轟斃者不

少賊知大河難渡遂銳意圖撲松林小河以冀
由瀘定橋直趨天全迭經土千戶王應元扼河
力戰前後共斃賊數千人甯越營都司慶吉委
員王樽等及土司嶺承恩復帶夷兵於初七日
由後路抄至新場一帶節節攻逼十二日乘夜
刼取馬鞍山賊營逆匪猝不及防夷兵從上壓
下殺斃賊匪數百名遂將馬鞍山佔踞絕賊糧
道逐日鷓剿狙擊斃賊無算十三日逆匪數百
人在下坝子窺探經蔡步鐘派撥弁兵與土游
擊包良潤由蘇村過河殺斃百餘名餘匪四散

我兵收隊過河從此逆勢日蹙糧以漸竭石逆
乃以箭縛書隔河射投千戶王應元啗之以利
欲使讓路王應元誓以死拒該逆復以利誘土
司嶺承恩欲使緩攻而嶺承恩攻之益急石逆
自知陷入絕地憤極思逞於十七日三更時盡
斬嚮導二百餘人祭旂傾巢而出分股一撲大
河一撲松林小河皆被唐友耕蔡步鐘及王應
元隔岸鎗礮轟擊兼以水勢湍急登筏者悉皆
沉溺對岸之賊亦紛紛倒地該逆智窮力竭因
伏賊巢殺馬而食繼以桑葉充饑咀嚼殆盡二

十三日辰刻瞥見賊二百餘人徑至河岸自棄器械口稱投誠唐友耕蔡步鐘察其形跡可疑督令開放鎗礮石逆親擁大眾由水陸分撲船筏二十餘隻被水飄沒五隻其餘悉被擊沉對岸之賊攀援崖磴魚貫猱陞我軍沿河用火彈火箭拋射並以鎗礮轟擊維時都司謝國泰已至松林地遂與千總陳太平土千戶王應元督率土兵渡過松林小河越窩營寨將楊應剛都司慶吉委員王樽顏汝霖姜由範把總史國楨練日雷顯發等亦同土司嶺承恩從馬鞍山壓

下兩路齊進直撲紫打地將賊巢一律焚燬斃賊數千名山徑險仄逃竄之賊自相擁擠漢夷兵練兩面夾擊槍砲如雨夷兵復登山巔用木石滾擊賊眾墜岩落水浮屍蔽流而下者以萬餘計石逆僅率餘黨七八千人奔至老鴉漩復爲夷兵所阻輜重盡失進退無路其妻妾五人抱持幼子二人携手投河其曾受僞職老賊自溺者亦復不少臣前以石逆或傳其死倘能設法生擒辨認真確俾就顯戮庶可以釋羣疑當經楊應剛等以該逆無路逃生於洗馬姑豎立

投誠免死大旗石逆果携其一子及僞宰輔會
仕和僞中丞黃再忠僞恩丞相韋普成等並餘
黨至洗馬姑乞降楊應剛嶺承恩等於二十七
日將石達開等五人羈留在營訊明新被裹脅
及老弱者發給路票遣散四千餘人尙有二千
餘名半係該逆五標桿賊臨陣用以衝鋒遂派
文武弁兵及土司嶺承恩之弟嶺承高押至大
樹堡復經唐友耕派都司唐大有等帶隊過河
約會副將張福勝都司慶吉等四面駐紮彈壓
於五月初一日先將石達開父子及會仕和黃

再忠韋普成押合過河唐友耕派遊擊龔定國
帶隊並蔡步鐘所派之知縣阮恩濤等護解起
程來省臣前於四月二十八日得報後慮其餘
黨殲除不盡將貽後患札飭藩司劉蓉馳往大
渡河會同唐友耕等委辦善後事宜乃石達開
等於初三日起解蔡步鐘等卽密派各營於初
四日過河是夜以火箭爲號會合夷兵將僞官
二百餘名悍賊二千餘名同時圍殺其偶有逸
出者亦被夷兵沿途截殺惟遣散老病者數百
人此股巨匪實已剿洗淨盡石達開父子及會

仕和黃再忠章普成等五犯於初十日押解到省臣以石達開自寶慶敗竄粵西後傳聞異詞前會奉

旨飭查臣亦不敢確指該逆是否尚在賊中而察其行兵詭計實與前次竄擾江西湖南湖北無異仰賴

天威現既俘獲到省自應審辦確鑿先令自瀘姑賊營逃出曾經認識石達開者辦認的確臣會同成都將軍臣崇實督飭在省司道親提該犯鞫

訊石達開自供與洪秀全等自廣西金田村起

事卽封僞王及竄擾各省情形歷歷如繪皆臣

所素悉語皆符合且其梟桀之氣見諸眉宇絕

非尋常賊目等倫實爲石達開正身無疑本應

檻送

京師以彰

國憲惟因道途遙遠著名巨憝未便久稽顯戮謹援陳玉成之例當卽恭請

王命將石達開極刑處死僞宰輔曾仕和黃再忠章

普成據供從賊多年受有僞職亦皆押赴市曹

凌遲處死其子石定忠現年五歲例應監禁俟

及歲時照例辦理並將石達開原供抄錄恭呈
御覽伏維石達開與洪秀全等首倡逆謀自粵西擾
犯湖南湖北江西安徽竄踞金陵其間攻下名
城戕害大吏不可勝計迨賊中憚其狡悍欲相
屠害乃復擁眾自雄由金陵屢犯安徽江西繞
竄浙江福建廣東邊境眾至數十萬圍攻湖南
寶慶府城經大兵合剿敗遁廣西黨羽逃散踰
伏山中蹶而復起突由兩湖直趨川境賊眾復
至十餘萬乃敗入黔滇仍敢由甯遠繞道內竄
其注意川疆志在必逞臣度其狡謀處處隨方
布置不使少留空隙仰託

駁文公公奏稿卷六

七

皇太后

皇上威福將弁兵勇暨土夷各兵用命逼使該逆陷
入絕地糧盡術窮不惟全股剿滅無遺且將十
餘年著名逆首生縛到省明正典刑應卽傳首
被害較重各省以彰

天討而快人心惟李福猷一股前由黔境下竄臣已

飛調臬司劉嶽昭由敘南馳赴江津以備截剿
乃此股賊匪由黔省遵義竄至綏陽正安地界
適值勞崇光由川省彭水取道入黔行抵黔境

之賈家寨突與賊遇田興恕奉

旨來川帶有勇丁二千名行抵綏陽聞勞崇光在賈家寨與賊相持卽星馳往援將賊擊退由正安

敗遁婺川臣已知照田興恕約會劉嶽昭兩面

合剿至黔省苗教各匪尤難數計在在皆與川界毗連而滇省回眾情既叵測且土匪此聚彼

散飄忽靡常敘南自滇粵各匪蹂躪以來遍地

瘡痍臣萬不敢因石逆巨股殄滅稍涉大意雖

於餉項萬分支絀之際仍須分布兵勇以防滇

黔各匪現已移調胡中和仍駐敘南並俟唐友

駱文忠公奏稿卷六

三

耕所部凱旋卽令馳赴江津綦江以固邊隅俾

川南各屬之民藉資休息以仰副

朝廷眷顧西南黎元之至意所有生擒偽翼王石達

開等並剿滅髮逆巨股理合會同成都將軍臣

崇實恭摺由六百里馳

奏伏乞

皇上聖鑒訓示施行謹

奏

謹將石達開原供抄錄恭呈

御覽

據石達開供係廣西貴縣人祖輩由廣東和平縣移來貴縣居住現年三十三歲父親石昌奎與母親均已早故並無兄弟娶妻王氏生有子女均在南京被害後來妻妾五人五人幼孩二人昨在河邊均投水身死只存這親生一子石定忠年五歲達開自幼讀書未成耕種爲業道光二十九年因本縣土人趕逐客人無家可歸同洪秀全楊秀清韋昌輝蕭潮貴馮雲山共六

駱文忠公奏稿卷六

三五

人聚眾起事共推洪秀全爲首洪秀全係廣東省人現年五十餘歲初時不過萬人後來人多三十年先踞永安州城後由永安竄出圍攻桂林省城解圍後二年三月走全州出省四月至湖南道州七月圍攻長沙省城蕭潮貴被官兵用砲轟死十月解圍竄岳州破湖北省城達開住學院衙署不幾日卽由武昌下江西九江府有曾發春領前隊破安慶省城曾發春已死三年直抵金陵從北門挖地道用地雷轟陷城垣進城時亂軍戕害文武官員辨不清楚達開起

事卽稱王與洪秀全等同住江南省城楊秀清平日性情高傲韋昌輝屢受其辱七年達開領眾在湖北聞有內亂之信韋昌輝請洪秀全誅楊秀清洪秀全不許轉加楊秀清僞號韋昌輝不服便將楊秀清殺死達開返回金陵要與他們排解洪秀全心疑要殺韋昌輝達開見事機不好走到安徽妻室兒女留在金陵均被韋昌輝所殺達開復由安徽回金陵洪秀全卽將韋昌輝殺了有謀害達開之意旋卽逃出金陵七年從安徽至江西浙江福建八年復回南安過

年九年到湖南桂陽祁陽等縣圍攻寶慶府城兩月有餘賴剝皮失營盤三座不能得手是年回廣西走桂林慶遠至賓州因夥眾三江兩湖人多各有思歸之念不能管束將大隊散回達開在南甯府沒有多人想要隱居山林因到處懸賞嚴拏無地藏身十一年復聚數萬人出廣西由湖南會同瀘溪龍山至湖北來鳳達開久想占踞四川省同治元年由利川入川到石碛涪州有二十多萬人後來沿途裹脅人數更多頭隊唐姓楊姓攻破長甯不能深入繞道貴州

遵義雲南昭通想從橫江過河令頭隊由屏山縣入令李福猷紮雲南副官村又令賴剝皮分股繞入甯遠府使官兵不能兼顧約在米糧壩交界地方與中旗會齊先進達開因橫江敗後率衆繞至米糧壩知前隊與賴剝皮已由甯遠大路前進李復猷自副官村敗退後欲由貴州邊界繞入川境達開卽率衆渡金江經甯遠恐大路有官兵攔阻改走西邊小路只要搶過大渡河卽可安心前進不料走至紫打地土司地方探看上下河岸皆有官兵河水忽長那些夷

人三面時來搶擄造船紮筏搶渡幾次均被北岸官兵擊沉傷了一萬多人後來食盡死亡無數達開正欲投河自盡因想真心投誠或可僥倖免死達開想救人俱合棄械投誠達開率領黃再忠等三人並兒子石定忠過河到唐總兵營內其尚未渡河眾人不知如何下落金陵安徽頭目出來多年不知現是何人陝西漢中頭目並不通問李復猷深知調度曾交三萬人給他管帶現在是否尙在雲南或在貴州未得

確信所供是實

再藩司劉蓉於四月二十九日經臣札委暫行
出省前赴大渡河辦理善後事宜所有藩司衙
門日行事件暫委鹽茶道啟芳兼理其一切文
移卽用鹽茶道印信以專責成理合附片陳明
伏乞

聖鑒謹

奏

駱文忠公奏稿卷六

呈

奏爲遵

旨覆奏恭摺仰祈

聖鑒事竊臣於同治二年五月初十日承准議政王

軍機大臣字寄同治二年三月二十七日奉

上諭雲南省城現在情形殆不堪問賈洪詔亟應赴

任惟貿然前往於事亦屬無濟著卽仍遵前旨率

同林鴻年等前赴昭東駐紮將滇省實在情形確

查具奏並卽出示曉諭滇省仍分良莠不分漢回

一切持平辦理將徐之銘屢有被叅之案此次省

城之變自請治罪朝廷另揀該撫赴滇係爲安輯

駁文忠公奏稿卷六

四

地方並非以徐之銘撫回爲罪等語剴切開示以

杜奸人從中煽惑韓超前派李有恒帶兵馳赴東

昭援剿兵力尙單曾經諭令駱秉章酌派官軍前

往協同防守所有東昭各軍卽著賈洪詔妥爲統

率以資鎮遏張亮基何日行抵黔省勞崇光計亦

可到卽著會同將滇省情形偵查的實如何辦理

與駱秉章熟籌迅速具奏等因全日又奉

上諭前命張亮基署理黔撫此旨令張亮基於到黔

後宣示何以韓超遽得聞知是否川省於行文黔

省時未經檢點直書新銜外省於此等要件往往

不知慎密致生枝節著駱秉章查明覆奏等因欽
此伏查雲南近日情形不惟徐之銘所奏各情
誠如

聖諭種種支離殊難憑信卽東川昭通曲靖各府稟
報亦皆傳聞異詞卽如徐之銘奏稱馬如龍前
在臨安接到省信致書梁士美及臨安官紳約
其共釋干戈同固根本重地並單騎親至城邊
泣血痛陳梁士美等爲之感動允其解甲修好
而臣接梁士美及臨安官紳來稟則稱杜文秀
等蓄髮僭號於省外顯行其逆馬如龍等負隅

駱文忠公奏稿卷上

四四

嘯聚於省中暗行其逆臨郡文武督率兵民戮
力同心賊來則戰賊去則守與徐之銘所奏大
相徑廷是滇省情形臣遠隔川疆勢難遙度而
勞崇光張亮基皆甫抵貴州省城彼處尙有應
辦事件且川省現以會剿陝南巨寇爲急一時

驟難分兵籌餉兼顧雲南若徒與勞崇光張亮
基往復咨商設或事機不密轉啟回眾狡焉思
逞之謀西與杜文秀固結莫解東圖昭通等府
以侵軼川黔邊疆將來更無從下手賈洪詔已
於二月間自川起程回湖北均州原籍臣已將

迭奉

諭旨恭錄咨會應俟賈洪詔取道來川再行妥籌辦
理至張亮基署理黔撫奉

旨之日張亮基尙在川境並未宣露臣亦未行文黔
省直書新銜合併陳明所有遵

旨覆奏各緣由理合恭摺具

奏伏乞

皇上聖鑒訓示謹

奏

駱文忠公奏稿卷六

四十五

奏爲遵

旨飭令田興恕回黔並密陳此間礙難查辦情形恭摺具

奏仰祈

聖鑒事竊臣等前接田興恕緘稱貴州撫臣張亮基到黔後恭傳

諭旨飭令來川聽候調遣現在黔境到處有賊必須帶勇數千方能轉戰而前等情臣等比時若拒絕不合帶勇必致懷疑生懼觀望不行是以緘覆祇准帶勇一千五百名以備沿途剿賊田興恕行抵桐梓綏陽境內適遇雲貴督臣勞崇光中途與賊相持田興恕督隊解圍追賊已抵正安臣等旋奉

駱文忠公奏稿卷六

聖

諭旨飭令田興恕仍卽折回黔省聽候勞崇光張亮基辦理當卽恭錄咨行田興恕欽遵去後頃接勞崇光張亮基來緘以田興恕若回黔省恐變故叵測囑令臣等仍照常催其速到成都設法羈住伏思此係黔省之案田興恕自應回黔方能辦結如慮變生他故田興恕在黔雖久握兵柄嗣以驕惰不復出省督兵民間固已缺望其

所部士卒久經缺餉亦未必樂爲効命且現既失勢折回其左右逢迎之人如張心培謝葆齡等又經另案拏問羽翼諒已無人若令來川則礙難查辦之處不勝枚舉現在川中楚軍雲集將領營弁多係田興恕曩日曾與共事之人武人不知大體皆不悉案情關係大局設竟爲田興恕所邀約伐求申救臣等若不爲之據情上達旣慮羣心解體於軍務大有關礙若竟從其所請代爲保奏法國必以臣等庇護瞻徇將置黔省而專與臣等尋衅以洩其憤轉致重煩

聖慮並查川中習教之人較之黔省尤多而傳教之人較之黔省尤狡若將田興恕在川查辦輕則彼國之人未遂其意此案仍不肯結重則彼教之人愈逞其志此後更形掣肘更有慮者田興恕所帶勇丁名爲一千餘人臣等暗訪實有二千餘眾設使急則生變負固不服勢不得不資兵力震懾而此間皆係楚勇倘或彼此瞻顧呼應不靈更屬不成事體臣等熟籌詳審田興恕來川種種礙難查辦情形皆於大局關係非淺

旨敕令勞崇光張亮基仍調田興恕回黔就近結案
免至川中又生一波實爲至幸謹合詞密陳由
驛具

奏伏乞

皇上聖鑒訓示施行謹

奏

駱文忠公奏稿卷六

四

再_臣等反覆思維田興恕或來川或回黔皆不免自懷疑懼必以帶勇剿賊爲詞藉圖自衛此時自以設法先解兵柄爲要可否請

旨以田興恕業經革職不便在黔剿賊而川省石逆全股盪平兵力已足分布亦毋庸來川調遣應卽勒令遣散勇丁自回原籍則田興恕心無疑忌亦不能藉口剿賊且旣回原籍亦無處覓餉其所部勇丁勢不能不散田興恕旣奉

命歸里一時亦可暫安其心俟勞崇光張亮基將此案擬結如田興恕例應治罪再請

駱文忠公奏稿卷八

四九

旨就其原籍逮問似倉卒之間或不致激成意外之變_臣等愚昧之見可否

施行謹附片密陳伏乞

聖鑒謹

奏

奏爲恭摺覆

奏仰祈

聖鑒事竊臣於同治二年七月二十八日承准議政

王軍機大臣字寄同治二年六月二十九日奉

上諭前據多隆阿奏李雲麟心浮膽怯言大而夸實非將將之才諭令官文嚴樹森駱秉章查明覆奏茲據官文嚴樹森奏稱覆加考察李雲麟廉隅耐苦頗能得士卒心惟其年輕氣盛議論煩多才具雖稱個儻性情不免粗疎若置之偏裨得知兵將帥薰陶磨鍊以老其才未必非他日干城之選此

駱文忠公奏稿卷八

辛

時閱歷尙淺猝投艱鉅恐致貽誤事機惟劉蓉則謀勇兼優戰功卓著其威望足資各軍統率且由川抵漢道路較近等語前經諭令駱秉章酌量調派劉蓉前赴漢南督剿俟察看李雲麟可以交付再回川省現在陝南羣盜如毛軍事日棘毛震壽一籌莫展因循貽誤而李雲麟既不能獨當一面亟須知兵大員前往接替軍事方能日有起色著駱秉章仍遵前旨卽飭該藩司督帶嚮導桂字等營趕緊起程前往督辦陝南軍務該處統攝無人賊勢日肆披猖駱秉章素顧大局務令該藩司星

速馳起毋稍稽延劉蓉並著專摺奏事一俟行抵漢南卽行迅速馳奏將此由六百里諭知駱秉章並傳諭劉蓉知之欽此臣當卽恭錄轉行藩司劉蓉欽遵前赴漢南督兵剿辦並委鹽茶道啟芳接署藩篆川東道吳鎬接署鹽茶道各在案旋於七月三十日復奉同治二年七月初二日

上諭前因漢南兵勇統領乏人節經諭令駱秉章調派劉蓉赴陝當此陝南軍情萬分喫緊恐事權不屬呼應不靈是以特授劉蓉爲陝撫該撫身荷厚恩膺茲鉅任自應感激激圖報迅速馳赴漢南整飭諸軍將興漢一帶賊巢尅期攻燬淨掃妖氛至漢回一事仇覺已深劉蓉到後總當握其要領持平辦理不可稍涉偏激以副委任劉蓉係駱秉章襄理得力之員茲旣簡放陝撫則身膺疆寄責有攸歸駱秉章惟當促其迅速赴任所有四川藩司員缺著駱秉章另簡賢員一面具奏一面派署以資臂助等因欽此臣當卽恭錄咨會劉蓉趕緊將經手事件料理交代以便迅速前往劉蓉定於八月十二日自省起程取道南江馳赴陝境親督諸軍相機進剿伏查川省所派援陝之師共計

一萬三千餘名現已陸續出境惟川北西自平武東至大甯袤延二千餘里皆與陝南犬牙交錯隘口紛歧實有防不勝防之勢陝南羣寇一經大兵攻剿該逆詎知川省重兵旣已越境難保不思伺隙紛竄蜀疆並查龍安一帶近與甘肅秦階接壤甘省南路賊勢方張亦不能不慎固邊圉是此時川北之防尤爲喫緊而劉嶽昭果後一軍現赴西秀剿辦李福猷一股距川北愈遠緩急不能回顧卽提臣胡中和所部在敘南防剿滇黔各匪亦斷難抽動惟建昌鎮總兵

周達武所部武字營暨知縣曾紀鳳定武營合計五千餘名現經臣札飭分布廣元昭化及陽平關一帶以備北路何處有警卽馳赴何路截剿不得不留此兩軍以固川北藩籬萬難再行移調所有太平城口等處亦須嚴防臣已預撥振武軍二千餘名前往扼要駐紮至川省餉項雖極支絀而此間所撥援陝之師臣斷不敢稍

分畛域其湘果中右兩軍嚮導桂字兩營月餉

臣仍督飭藩司按月籌解並飭糧台委員代爲

采辦米石以資源源接濟俾劉蓉督率諸軍鼓

行而前迅盪陝南羣寇藉以仰慰
聖厯理合恭摺由驛覆

奏伏乞

皇上聖鑒訓示謹

奏

駱文忠公奏稿卷六

五

奏爲新任雲南撫臣已抵川省並訪聞滇省大概情形恭摺具陳仰祈

聖鑒事竊臣欽遵

諭旨疊次咨催新任雲南撫臣賈洪詔迅速來川以便進駐昭通賈洪詔已於十月初七日行抵四川省城與臣接見面議必須先籌大局方可徐規進取適值前任雲貴督臣潘鐸之櫬已由雲南到蜀臣與賈洪詔當傳其家丁周升細詢潘鐸被害緣由及雲南省城情形據供上年潘鐸道經曲靖回弃馬連升接見卽面稱有人給信

駱文忠公奏稿卷六

五

令伊設謀殺害潘鐸置之不問行抵板橋岑毓英馬如龍擁眾接其入城潘鐸接印後極思整頓安輯回漢而馬復初示意欲封平南王當經潘鐸拒絕從此懷恨包藏禍心兼以岑毓英欲定新章馬如龍求剿臨安潘鐸皆持正不遂其請由此各懷怨望迨今正馬榮帶練入省潘鐸屢次催令出城偃蹇不行馬復初岑毓英等皆預知其逆謀而潘鐸勢成孤立不得已於正月十五日親至五華書院面見馬榮力爲開導馬榮遂曠眾動手潘鐸身被七傷死事甚慘時楊

振鵬在側亦未聞護救潘鐸尸身暴露三日其家丁哀懇楊振鵬轉求馬復初發回字令旂方得草草棺殮二月初一日馬如龍自臨安回省是夜開仗楊振鵬立城上不淮開鎗礮天明遂送馬榮出城並供去歲冬月間馬復初徐之銘派回人武進士田慶餘赴大理招撫回省面稟杜汝秀實不授撫若將大理永昌麗江三府裁撤漢官皆給回人安設土司卽永不滋事等語臣揆此情形不但杜汝秀負嵎自固卽馬復初岑毓英楊振鵬等皆心懷叵測徐之銘則依阿其間此時賈洪詔若徑入滇境省城必派兵迎接陽爲擁護陰存挾制倘賈洪詔輕進省城不免蹈前車覆轍若邏巡不前又恐自失威重進退皆難自由不惟進規雲南省城非重兵巨餉不能展布卽暫駐昭通亦必力能制人而後可以不受人之制惟川省現在援剿漢南兵分餉緇川南又須防範此時川省兵力實難兼顧滇省統俟賈洪詔確探東昭一帶實在情形籌畫周妥應如何措辦再由該撫臣自行具

奏臣謹將新任雲南撫臣已抵川省並雲南省城

大概情形謹繕摺由驛具陳伏乞

皇上聖鑒訓示謹

奏

駱文忠公奏稿卷六

五

表

手工學藝備示

大猷部運籌錄詳由驛具陳分

奏爲廣東花縣前已封禁煤窑近復遺禁開挖易
致聚匪滋事請

旨飭禁以杜患萌事竊

臣

接據本籍花縣紳耆王立

俊等公緘稱花邑象山脚等處產煤自乾隆四
年乾隆三十四年迭經本縣封禁嘉慶二十一
年復經前任巡撫董教增勒石封禁皆因開挖
煤泥不但有礙田園廬墓且匪徒易於聚集不
免滋生事端是以歷年封禁實爲慎重地方起
見乃自咸豐十一年二月間有劣衿盧桂芳串
通土棍王文田及舉人游鰲勾引南海奸商區

駱文忠公奏稿卷上

七

彬秀生員易蓮生職員林樂善滕稟本縣詳准
強在象山脚仙閣鄉担米坵大窟企人石西嶺
圓田山下嶺等處開採煤泥先勾通象山脚各
村土豪江南標武舉江耀清等竟向象山脚等
八處開挖經職員江立常生員王熙光等稟請
封禁廣州府批令舉人譚蛟查勘乃區彬秀等
賄囑譚蛟含糊稟覆區彬秀遂得恣意開挖自
開採之後附近墳墓慘遭毀棄固不待言而聚
匪愈多劫盜頻仍咸豐十一年二月間平山墟

運合油店被劫六月間新街三益油店被劫十

二月間三八墟怡名鞋店被劫同治元年八月
間三八墟合豐油店被劫又草羅村梁姓被劫
刃傷事主十一月間新街協益染房被劫十二
月間舊三八墟正記鐵店被劫二年正月間平
山村江姓又有開棺劫尸之慘迭經報官有案
其餘被劫之家更難悉數若再開挖蔓延必至
釀成巨禍其害更不可測等情伏查花縣界連
五縣踞省城上游相去僅九十里西南界連南
海三水地尙平衍東北界連從化清遠番禺山
勢綿亘盜賊最易潛踪溯自康熙年間花山賊

起官兵剿辦數年始定嘉慶年間復有匪徒缺
牙春及砂砲德擾及縣城咸豐四年紅匪攻陷
縣城竟敢直撲省垣皆緣縣境山多徑雜鄰界
交錯賊匪易於藏聚出沒無常現今區彬秀林
樂善等以採煤抽釐可以助餉藉詞動聽實則
奸商據爲利藪而官役人等以及附近劣矜受
其賄賂祇圖目前微利竟忘將來巨患任其開
挖聚集既眾盜劫橫行被搶之案旣已層見迭
出且慮遠處匪徒聞風麇至藉煤廠爲潛踪之
所招匪黨爲煽禍之源伏維高州之盜未平土

客之闕方熾設一旦勾結爲患花縣距省甚近
朝發夕至稍有蠢動人心震駭勢將重煩兵力
卽所抽煤釐爲數無幾亦恐得不償失臣籍隸
花邑情形旣所素悉茲據紳耆連名致函切陳
挖煤聚匪之害不可勝計因於地方大有關礙
臣不敢引嫌避怨緘默不言用敢縷陳

宸聽相應請

旨勅下兩廣督

臣

廣東撫

臣

將現在花縣境內開挖

煤窰處所永遠仍舊封禁不許開採以靖地方
而杜亂萌伏候

駱文忠公奏稿卷六

五

聖裁所有廣東花縣開採煤廠易於聚匪滋事請
旨飭禁緣由恭摺具陳伏乞
皇上聖鑒訓示施行謹

奏

奏爲恭摺覆

奏仰祈

聖鑒事竊臣於同治二年十月二十九日承准議政

王軍機大臣字寄同治二年九月二十八日奉

上諭漢南援軍新挫賊勢鴟張陝南固形糜爛而川
北各隘之防亦更形喫重且中旂逆匪由畧陽竄
蔓甘肅徽縣一帶已包出川軍之左駱秉章現派
許蔭棠率所部赴蕎莊黎鴻鈞率所部由松潘前
往合紮調果後九營馳赴保甯一路所籌均尙周
妥務須飭令派出各軍實力防剿以固川疆劉蓉

駱文忠公奏稿卷六

李

已抵保甯著卽迅速前進相機剿辦迅克漢中城
固等城惟該撫所恃以進剿之軍卽此湘果等營
現在銳氣已挫一時恐難進攻應否將派赴保甯
之果後九營移紮前敵協同剿洗之處著駱秉章
劉蓉酌度情形妥籌辦理至漢中城固失守情形
前據張集馨奏毛震壽與川將所稟互爲歧異當
諭令劉蓉查奏究竟該城是否爲賊所踞漢郡人
民曾否潰圍而出盧又能何以開門出走現往何
處沔縣文武收復城池是否確實並著駱秉章詳
細查明據實具奏等因欽此伏查漢南賊勢蔓延

甚廣而以剽悍大隊麴聚於黃官嶺牟家垠法
慈院紅廟塘新集一帶銳意窺川湘果桂字嚮
導各營甫挫之後軍威難以驟振臣已飛飭果
後也營田保甯馳赴巴州聽候陝西撫臣劉蓉
調撥前赴南通邊界與湘果桂字嚮導各營聯
絡聲勢力圖扼剿復由昭化抽調叅將許蔭棠
一軍馳往通江移緩就急以期周密惟賊勢浩
大兵分見單昭廣一帶隘口紛岐僅有武字定
武兩軍及叅將黎鴻鈞所部共六千餘人分布
各隘以扼賊衝兼備中旂股匪及曹逆由甘境

旁抄暗襲勢難越境出剿此時劉蓉若徑帥各
軍出青石關以規漢南賊得分路衝突以全力
抗拒難期得手須俟新募楚勇到齊兵力既厚
可分可合或剿或防數路並進大張撻伐漢中
可望肅清川境不致蹂躪至漢郡之賊前因援
軍失利遂越城縱火房屋一概延燒城乃失陷
據湘果各軍稟報漢郡人民因賊全數調過南
岸其圍已鬆遂於二十日三更放火潰圍而出
紛紛向城固一帶逃走現據劉蓉咨及各路探
報該逆日拆民房磚石增修城垣意圖久踞又

據總兵周達武稟報城內逃出難民供稱盧又熊死於城下其餘文武未知下落等語是否屬實亦難遽信其盧又能開門出走現往何處果否尚在未得確聞沔縣城池雖據毛震壽稟稱經該縣文武官紳收復據定武營曾紀鳳據報沔縣之賊退城後悉聚褒沔之交黃沙驛長寨等處現查留垣褒城新集一帶賊尙縱橫沔縣如何收復之處難以確探應請

勅下陝西撫臣劉蓉就近確查具奏所有奉

旨飭查各緣由理合恭摺由驛覆

奏伏乞

駁文忠公奏稿卷六

三

皇上聖鑒訓示謹

奏

奏爲據實覆陳恭摺仰祈

聖鑒事竊臣於同治二年十一月十一日承准議政
王軍機大臣字寄同治二年十月十四日奉

上諭福陞奏滇餉無從商辦請派大員統率並預籌
軍餉請整頓銅廠鹽井各摺片據稱雲南軍務緊
急勞崇光現駐黔省往返咨商動輒數月賈洪詔
尙無入川確信會商之路秉章籌餉赴昭乃因川
省需用浩繁坐候兩月無款可籌瀘局捐項全被
張亮基提撥請揀派親信大員赴滇督辦在各省
酌量籌撥軍餉運赴昭通接濟又查滇省向有銅

鉛各廠暨白黑琅等處鹽井如官爲辦理每歲可
得銀數萬兩銅鉛各廠如能認真攻採可期豐旺
用以配搭鑄錢亦可得數萬兩但非先籌餉數十
萬不足以爲進攻戰守及採辦銅鉛各廠之資若
銅鑛果旺可由昭通運川仍在瀘局鼓鑄變易銀
兩至於鹽務遴派熟悉井地之員認真整頓再委
武弁常川防守以免再擾從此可專力進征剿撫
兼用各等語所籌不爲無見著駱秉章勞崇光按
照該提督所奏酌度興辦以裕餉源至採辦銅鉛
各廠需費甚多能否由川省先行提撥若干此後

滇省以銅鉛運川在瀘局鼓鑄即可陸續歸償於川亦無所損其鹽井應如何派員整頓之處並著駱秉章妥籌辦理賈洪詔疊經諭令赴川與駱秉章會商滇省軍務何以此時尙無到川消息現在行抵何處著卽趲程前進抵川後將福陞所陳各節與駱秉章籌議辦法仍遵前旨迅駐昭通不准任意耽延致負委任張亮基前奏以鉛斤撥解滇局抵還各省協餉該撫會否收領張亮基經手捐款欠滇之項尙多並著催令解滇歸款以資接濟福陞以滇事爲己任力籌辦法甚屬可嘉著卽設

法先赴昭通妥籌剿辦蕭浚蘭林鴻年二員現在會否赴滇並著賈洪詔催令趕緊前往無任遲滯將此由六百里各諭令知之欽此伏查滇省銅鉛各廠久被賊匪竄擾或爲土練盤踞此時如議開採招徠鑪戶催募砂丁需款甚鉅不惟川省庫儲萬分支絀不能代籌卽使工本有資而雲南遍地銅氛一介行李尙難往來豈能源源轉運使銅鉛流通出境至白黑琅等處鹽井皆在楚雄府境內自杜文秀叛逆以來各井早爲賊踞川省固無從委員前往雖滇省亦驟難舉事

是雲南提臣福陞所議酌度與辦銅鉛各廠及鹽井之利以裕餉源言之甚易實則平定雲南以後應辦之事是以滇省現在情形尙未洞悉並查該提臣自抵川省臣屢次接見詢以滇事所言皆未中肯綮及詰以前次奏陳所謂六難者之所以難所謂六易者果何以易乃茫然莫應毫無把握惟請臣於滇境張貼告示曉諭漢回即可息事窺其言論既無真知灼見竊疑前奏非自己出嗣臣催其遵

旨前赴昭通則謂雖住川省即可作爲已赴昭通臣

當卽語以辦理軍務大員駐紮地方自當據實奏報豈容含混該提臣亦無辭以答其昧於大體已可想見臣接雲貴督臣勞崇光來函亦稱

因昭通練頭李芝順係該提臣前在昭通鎮任內拔擢重用委署守備現在聚眾滋事函致該

提臣設法彈壓解散得其回書全不著痛癢等

語臣并詢之雲南撫臣賈洪詔據稱前在滇省

稔知該提臣不能辦事現在川省惟以索支養

廉爲事此外別無籌商伏維滇省諸事墮壞已

極提督握全省兵柄非威望素著不能藉資整

理現任提臣福陞前在滇省雖久既非眾望所
孚此次來川察其言論又無一長可採其前後
兩疏似皆爲人慫恿並非自抒己見膺此重寄
竊慮弗勝將來與雲南督撫籌辦滇事轉致掣
肘臣既有所見不敢以福陞係鄰省武職大員
稍避越俎之嫌緘默不言聽其致誤事機用敢
據實由驛具陳伏乞

皇上聖鑒訓示謹

奏

奏爲密陳西藏情形請

旨權宜辦理仰祈

聖鑒事竊臣等於同治二年十一月初十日承准議

政王軍機大臣字寄同治二年十月十一日奉

上諭前因滿慶等奏瞻對野酋糾眾圍困裡塘明正

土司官寨等情當照所請諭令駱秉章酌調土兵

援剿並協撥兵餉旋據崇實駱秉章奏西藏土兵

沿途滋擾請令撤回並密陳將徵呼圖克圖與汪

曲結布構衅情形及李玉圃挾制主使請調開以

離其黨均經照所請飭辦又文祥等奏審辦將徵

駱文忠公奏稿卷六

三七

呼圖克圖一案當將滿慶等先後奏報自相矛盾

之處復諭令福濟景紋秉公逐款詳訊迄今數月

之久土兵曾否撤回瞻對情形若何道員史致康

等前往開導能否遵諭解散未據該將軍等覆奏

而福濟竟以路梗折回成都杳無赴藏消息朝廷

正深廑念茲據滿慶等歷陳將徵捏具冤詞聲明

原案始末並委員李玉圃起程馳赴乍察相機辦

理瞻逆事務叅劾拉里糧務嚴清榮任性乖張並

爲達賴喇嘛汪曲結布代進奏書及喇嘛呈進貢

物各摺片覽滿慶等所奏如將徵冤詞內有兩寺

喇嘛與彼送銀五十兩哈達一個令其進京告狀一節滿慶等則稱該喇嘛聞知哆徵有苛派銀兩之事故意送銀形容以示羞辱殊出情理之外所稱總堪布膽敢向山上放鎗係奉哆徵之命而來等語無論哆徵未必果有此事而總堪布一經放鎗卽被執事人等捆縛所帶土兵何竟無一人援救滿慶等既知汪曲結布與哆徵有切齒之仇何以將伊調藏汪曲結布既係僧眾及辦事大臣調來而滿慶摺內則稱哆徵求調汪曲結布來藏並非好意有半途刺殺之心亦未免有心文致汪曲

結布曾充葛布倫台吉於咸豐八年辭退曾經滿慶奏明惟哆徵供稱汪曲結布係有罪革退之人史致康言伊卽係解回配所之壁喜究竟汪曲結布有無發遣案據均應逐一查究著福濟景紋於抵藏後迅將哆徵與汪曲結布呈訴各情前後諭旨內駁詰各節確切查明如滿慶等有與汪曲結布朋比爲奸捏詞飾奏情弊卽著據實嚴叅並將汪曲結布撤退斷不可令其把持藏務如滿慶等所奏並無虛捏汪曲結布果爲僧眾所信服其辯寃奏書所列濟隴呼圖克圖眾頭目出具圖記之

處均係情真事實卽可俯順輿情令汪曲結布協
理藏務用示羈縻是在福濟等斟酌妥爲辦理以
安藏地至汪曲結布於道員史致康等稟稱瞻對
台藏東路滋擾已非一年蠻觸相爭非同侵犯內
地等語曉曉置辯謂天朝有外之之意史致康等
此稟不過因川省軍務未平暫緩進兵起見駱秉
章何遽咨行駐藏大臣衙門致僧俗得以互相傳
播藉爲口實未免疎忽滿慶等接到此咨未將漢
文義理向僧俗明白解說致令驚疑亦屬不合本
日亦已嚴諭滿慶等妥爲宣布安撫土兵旣不得

力而瞻對又不可理論豈可任其恣意侵犯致梗
驛路川中兵勇甚多現在屬境亦頗安謐著駱秉
章迅卽調派得力將領酌帶勁旅剿洗瞻對匪徒
務令藏路疏通而明正土司等得以各安生業以
副朝廷懷柔遠方之意至所稱東路法國羅勒拏
蕭法日等於今春派無賴劉姓由鑪城運來茶包
在巴裏一帶散給漢兵要結人心並捏造謠言誘
惑巴塘正副土司投赴瞻逆是否有此情事著崇
實駱秉章查奏又羅勒拏等聲言景敘奉有諭旨
將前藏所屬之擦瓦博木噶地方賞交伊等永遠

管理凡有天主教之人進藏者不准阻止等語如果屬實該教士假傳詔旨殊屬可惡除諭令總理衙門向法國駐京公使據理駁斥外著崇實駱秉章嚴飭沿邊各屬認真查察如有內地傳教之人潛赴藏地者概行截回毋令乘間偷越披楞因法國有入藏傳教之信亦欲來藏通商其意實屬巨測廓爾喀於去冬遣人來藏復修舊好其西北各小部落亦願與藏永作藩籬著福濟等乘勢利導飭令廓爾喀等永敦舊好嚴密防範以杜披楞窺伺之心糧員嚴清榮有無與羅勒拏暗中勾結情

事是否將由藏截回川省之教民吳姓留住江達署中且用過吳姓銀五百兩作爲借項擅將由藏發出摺報停壓六箇時辰捏稱有蠻子二人來搶此摺種種紕繆不可嚴切根究著駱秉章會商福濟將嚴清榮撤回秉公查辦另選賢能之員前往接管糧務據滿慶奏委員李玉圃帶領把總馬騰蛟等及漢番兵丁人等馳赴乍察一帶相機辦理剿撫瞻逆事務等語所調土兵前已有旨撤回李玉圃會否遵旨來京抑或尙在乍察著駱秉章查明奏聞李玉圃係將徵案內待質要證本日已諭

合滿慶等仍遵前旨飭該糧員迅速來京俟福濟等折回成都時聲稱藏中事務隨時與將軍等面商今既數月試問所商何事作何辦法又云一俟驛路疎通卽速赴藏以副委任現據滿慶等奏藏中僧俗大眾盼望福濟景紋二人來藏將各案辦結以安人心已飭商上特派曉事番目持達賴喇嘛夷札赴鑪而見明正土司諭令安站迎送是驛路不患梗阻且滿慶等奏報可以東來福濟等行李豈不可以西去福濟前因規避雲南省分延不赴任獲咎甚重經朝廷棄瑕起用復敢安坐錦城

不思設法馳赴藏中將支查案件迅速辦結竟是不思設法復萌大不曉事著卽恪遵疊次諭旨會同景紋星速前進不准再事耽延儻仍以路梗爲辭致藏眾日久生心藉端滋事而滿慶等反得倚恃汪曲結布等爲藏身之固定將福濟景紋重治其罪毋謂言之不預也滿慶等摺片五件代進達賴喇嘛等奏書四件均著鈔給崇實駱秉章福濟景紋閱看將此由六百里各諭令知之欽此

臣等前以

西藏雖因尅扣布施啟釁實汪曲結布藉端報

復勾結李玉圃等暗中煽構釀成禍端爾時略

徵呼圖克圖尙未離藏與布賚綳寺勢正相持
臣等非僅據糧員嚴清榮等稟報兼得西藏當
差之滿營駐防旗兵家信既經訪聞實情不敢
不上陳

宸聽以彰是非迨呼徵勢不能敵携印潛行李玉圃
等復從愚滿慶朦混具奏以汪曲結布掌辦藏
務卑以大權汪曲結布既遂私願極力牢籠人
心復藉剿辦瞻對爲名大張聲勢滿慶並有請
旨將李玉圃破格錄用之奏其爲李玉圃煽惑主使
以爲邀功掩罪地步顯然可見臣等以汪曲結

駁文忠公奏稿卷上

十一

布其勢已成與呼徵尙未去藏時情形迥異復
密陳請

旨先將藏兵撤回並調李玉圃赴京質証以去其主
謀之人乃滿慶李玉圃汪曲結布既以呼徵到
京控訴復知嚴清榮等稟報所有真情不免敗
露乃復益肆欺詐滿慶摺中既盛稱汪曲結布
之功爲眾人所歸向而汪曲結布等奏書中復
力剖滿慶李玉圃之寃非此二人無以保全藏
卽此已可見其互相固結隱露不可動搖之勢
其尤狡者以瞻對爲名藉可市惠土司形容內

地之不爲調兵剿辦使各上司以此缺望日與
內地饒舌甚至撤站要挾殊不知瞻對之患非
始自今日自嘉慶年間用兵之後迨前任督臣
琦善大集兵力糜餉至數十萬迄未得其要領
蓋以瞻對僻處鑪關之外地險碉堅山徑紛雜
內地徵兵既不熟習地勢兼以天時水上異宜
糧運更屬維艱萬難持久兵進則彼伏而不出
兵撤又復乘間竊發而附近各上司心志不齊
無一自強每遇瞻對侵掠非甘心依附卽要求
內地派兵而坐觀成敗此在內地無事之時雖

有重兵巨餉尙難必操勝算剗淨根株况值此
內患未平安有餘力以及邊遠之區乃滿慶李
玉圃等明知內地無兵可撥無餉可籌故以會
剿責之內地使之種種爲難所調上兵名爲由
藏籌給四月之餉此後卽須川省撥解實則沿
途搶掠前在巴塘已有明徵旣逾四月之期卽
可藉索餉向內地尋衅俾臣等爲之任過如云

實爲剿辦瞻對起見十餘年來瞻對無歲不出
巢侵擾何以未聞藏中派撥一兵此次獨不待

奏調亦未經與臣等預商已令李玉圃統眾前來

况瞻對早已歸巢雖難保其不復出擾亦祇宜
嚴防察乍不使闌入藏地何以必期內地派兵
會剿且欲川省供給藏兵之餉是非徒與臣等

爲難直欲挑動邊衅其居心何等諒已難逃

聖鑒更可異者以臣所咨滿慶公文竟敘入奏書之

中不特藉蠻觸相爭一語謂失閤藏僧俗之心
欲以聳動

天聽並將史致康與建昌道鄂惠會稟之詞逐層引

述伏查臣駱秉章所咨之件係知會滿慶無須

派兵非使其將所咨之件遍告閤藏僧俗况咨

駱文忠公奏稿卷六

七五

件係屬漢文非經繙繹汪曲結布何以通曉其

駐藏衙門一切公事皆爲李玉圃等與汪曲結

布串通一氣卽此不辯可知至天主教自弛禁

以來各省旣已聽其傳習西藏亦難必其不往

且羅勒拏於道光年間旣已入藏爾時未聞藏

中驅逐何以弛禁之後此時轉欲禁止若謂羅

勒拏于預公事並假傳

詔旨及誘惑巴塘正副上司投赴瞻對等事臣等旣

未據各台文武稟報有案亦別無所聞此滿慶

李玉圃明知弛禁傳教乃

朝廷因和議既成不得已而顧全大局滿慶等故以此刁難且其摺中何以不敘及此事特借奏書以爲無所顧忌遂敢大放厥辭並查達賴喇嘛尙在冲幼既無呈遞奏書之理其餘僧俗向無呈遞奏書之例滿慶敢爲汪曲結布等違例呈遞者正藉此暢所欲言以呈其恐愒要挾之私且請

旨飭催福濟景紋赴藏查辦以此竊窺

朝廷意旨其與徐之銘之在雲南屢催新任督撫赴滇同一機括福濟等勢既不能統帶重兵長驅

駱文忠公奏稿卷六

七

直入若竟輕進卽使中途無阻一入藏地手無寸柄不能不爲滿慶李玉圃汪曲結布等把持挾制必使附和以護其從前之謬則是非愈以混淆若福濟等不肯俯從一經澈底查辦敗露其奸難保其不更相固結陰謀效尤滇省使蹈不測之禍不但益損威重且得藉端煽惑以爲查辦之人激成事變以此誘過於內地之辦理不善枝節橫生愈難收拾是此時欲令福濟等赴藏認真查辦而李玉圃汪曲結布陽奉陰違詭譎百出其變故更難逆揣李玉圃現已行抵

何處是否遵

旨赴京抑或仍自統帶藏兵該員從無一字稟報到
臣等且數月以來察乍以西各台糧員稟報不
通卽藏中當差駐防旗丁亦無家信到川聞係
藏中沿途設卡盤詰惟滿慶摺報可以傳遞其
餘公文私函均須拆看如遇言及藏事及旗兵
滿文家信概行銷燬此後藏中實情愈無從究
詰臣等籌商至再惟有權宜辦理無待查辦先
將哆徵之案暫爲消弭以釋藏中之疑而離其
勢竊以西藏屬在遐荒但使僧俗相安無妨暫

暨文忠公奏稿卷六

七

示羈縻臣等愚昧之見可否請

旨宣示藏中以哆徵失察堪布尅扣布施不能無過
或將哆徵安插別地或暫羈京師俟李玉圃到
京折服哆徵定行重懲使汪曲結布知哆徵不
復回藏所有藏務仍遵前次

諭旨卽飭汪曲結布協同達賴喇嘛掌辦令其撫輯
僧俗務使各寺相安永息爭端不准區分黨類
恃強凌弱再生事端倘能全藏底定尙可破格
加恩則汪曲結布卽不慮查辦前案釋其疑懼且知

予奪出自

宸斷無須滿慶爲之要求羣小之黨可散庶免狼狽
爲奸並請

飭令將藏兵調回祇防藏地毋庸越境會剿所有滿

慶等種種欺詐之端暫緩宣露請

旨飭令回京並催李玉圃迅速遵

旨來京俟滿慶等到川臣再將李玉圃押解赴京請

欽派大臣秉公嚴訊與呼徵質對不難水落石出如

滿慶等果有朋比爲奸之罪旣以到京

朝廷治以應得之咎俾免抗辭狡辯藉西藏爲藏身

之固亦得以伸

賢文忠公奏稿卷六

七

國法而儆效尤其嚴清榮破參之案亦俟將該員撤

回內地再行查辦至瞻對前已回巢史致康早

經前赴鑪城惟明正裏塘各土司藉欲剿辦瞻

對要求內地調兵發餉因此不肯安站伏查瞻

對旣未出巢此時萬難勞師糜餉以勤遠畧史

致康現派阜和協兵五百名先紮河口查拏夾

琪以次疎通道路所有覆陳西藏情形暫籌權

宜辦理是否有當謹合詞恭摺由驛具

奏伏乞

皇太后

皇上聖鑒訓示施行謹

奉

賢文忠公奏稿卷六

七

奏爲官軍攻剿滇邊逆匪大獲全勝並掃盪硯寨
伏賊川界肅清恭摺由驛具

奏仰祈

聖鑒事伏查逆匪何金瀧屢在川滇邊界滋擾聚散

靡常提臣胡中和親統湘果左軍駐紮敘南臣

慮兵力不敷分布復調總兵李復勝帶果後三

營由興文一帶聯絡聲勢何逆在滇邊糾合游

匪數千人於十一月十五等日竄至川界筠高

境內當經提臣胡中和分飭各營出六成隊伍

並約會總兵李復勝等果後三營於十七日向

安尾壩斑竹塘進剿該逆聞我軍驟至將由王

家場圖竄建武瀘衛等處我軍兼程急進於二

十日午刻馳抵川滇交界之斑竹塘該逆以三

千人分爲三隊嚴陣以待總兵胡日祥等率隊

以衝其中總兵李復勝等率隊以攻其右總兵

楊耀關等率隊以扼其左總兵王聚蘭陳再益

等分左右繞出其前以備包抄而防埋伏該逆

悉力拒敵逾時勢不少衰王聚蘭等忽分兩路

包抄而進賊陣左右先動李復勝楊耀關等揮

軍猛進賊之中隊亦不能支且戰且退我軍追

斬六百餘級該逆敗踞滇界之郭家墳山勢險峻意圖負隅我軍於二十一日黎明揚旂擂鼓直撲賊壘該逆憑險施放滾木插石總兵劉名崇頭受石傷總兵唐桂林左膝右足均受石傷各營勇丁憤極一擁齊登山梁該逆抵死抗拒我軍奮力兜擊斃賊千餘名墮巖死者不計其數餘賊敗竄下山總兵黃清源叅將鄒復勝率隊從左右林中衝出復斃賊八百餘名餘逆突圍而出我軍追至羅卜地沿途斬拾殆盡生擒僞先鋒毛姓及賊目趙心大吳新達等均於軍

前正法奪獲騾馬數十匹旂幟器械無算旋據雲南威信司州判沈基源稟報團練將何金瀧擒獲於十二月初二日解至行營經提臣胡中

和親託並非何金瀧乃係被脅從賊之王安邦是何逆是否已經伏誅尙未可知臣仍飭各營

及地方官嚴密搜捕務絕根株因查金子溝四方硎馬草硎响水硎雙耳硎等處均有賊匪潛

伏向與何逆勾通並查何逆家口潛藏富康岩

硎中提臣胡中和總兵李復勝等遂分派各營

隊伍分道並攻該處類皆懸岩峭壁我軍梯險

而升賊皆伏而不出惟以木石狙擊勇丁往往帶傷乃用土人多備椒蓼茅草沿碉薰燒賊始突出我軍立即迎斬每碉或數百人或數十人不等悉皆搜殺內有頭目張三大張明宗明老五章飛熊張花臉等數十名均經說明正法復將富康岩碉攻破何逆之弟何二耶姪何發祥何元洗並碉首吳山亡等十餘名均已擒斬各碉伏賊一律勦滅淨盡惟滇邊散練游匪實繁有徒此滅彼起誅不勝誅現仍咨會提臣胡中和分派各營嚴防要隘復據南川縣稟報黔省

號匪由正安關八川界臣已飛飭果後三營由興文馳剿所有此次出力將弁著有微勞可否由臣擇尤請獎傷亡勇丁容臣查明照章辦理所有官軍攻剿滇邊逆匪大獲全勝並肅清碉寨緣由理合由驛具

奏伏乞

皇上聖鑒訓示謹

奏



